

《大方廣圓覺修多羅了義經導讀》補充講表

◎附表二十

○唯願不捨無遮大慈，為諸菩薩開祕密藏……得聞如是修多羅教了義法門永斷疑悔。

◆先請決深疑也。願而言唯者，顯求之親切。謂無別所願，唯求開祕密藏，利現會眾，及末世生耳。

◆「不捨」者，顯求之決定。謂密藏不易開，明知不易，非無遮大慈者不能。

◆「祕密藏」三字，不指佛果三德，亦不指眾生心，直是「請決三疑」。意謂此種深疑，若未難不說，難又不說，是欲祕之，名為祕藏。若因難而說，說不顯了，是欲密之，名為密藏。為求當下即說，仍要說得顯了，名之為開。二藏既開，真信斯啟。不唯近益現會，兼復遠益未來，故云：及末世生也。此種請示，真是修多羅中了義法門。後世聞者見者，俱可永斷疑悔也。疑悔能障正見。既已永斷，則正信成，正見朗矣。作是下四句，是至

三顯慙。（三德祕藏：是佛果之所證，與此處所指義別。）

○爾時，世尊告金剛藏菩薩言：「善哉！……金剛藏菩薩奉教歡喜，及諸大眾，默然而聽。

◆重言「善哉」，以請開祕密兩藏，現未俱得益故。乃能者，獨許菩薩一類，始能扣關擊節。餘諸凡小，皆不能也。

◆如來甚深祕密者，顯所伸難意，是如來所證甚深之義。有意祕而不說，即說亦不欲顯了，唯密意說。必待金剛藏致問者，為是究竟成佛方便，非此人不能問故。足見問後如來開示，是菩薩最上教誨了義大乘。故能使修學菩薩，及末世眾生，有大乘善根者，了斯祕密之義，成就大乘正見，永無退轉。故曰：得決定信，永斷疑悔也。餘可知。

◆金剛藏所請，的是甚深祕密。在佛並非有意祕而不說。因說必以時，且必應機。有機則說，無機則不說。機順則說，機不順則不說。故今必待金剛藏啟請方說也。

◆此種甚深義理，非金剛藏不能請，亦非佛不能說。有問必說，是佛之大慈。眾生是心是佛。諸菩薩是心作佛。蓋眾生迷而不覺，是有性德而無修德。諸菩薩覺而不迷，全

是修德。作佛之「作」字，即修德也。金剛藏為眾生起疑，即關係此點。

○善男子！一切世界始終生滅，前後有無，聚散起止：循環往復。種種取捨，皆是輪迴。

◆一切世界：總指三種世間。「始終生滅」：約正覺世間，謂隨緣示生為始，緣盡入滅為終，中間變易為生滅。「前後有無」：約有情世間，謂前有生相為前，後有歿相為後，中間有住異為有無。「聚散起止」：約器界世間，謂成劫時，聚塵成界為聚；空劫時，散界成塵為散，中間住壞為起止。言住前必起，住後必壞也。「念念相續」：通指情器二種，謂生住異滅，四相遷流，剎那不斷也。「循環往復」：有情則死而往，生而復。器界則壞似往，成似復。如循環而迴轉，終而復始也。

◆「種種取捨」：別約有情，即指第六識生滅緣影心也。前六對皆為境，此取捨是屬心。境既念念相續，循環往復，心亦復爾。故云：皆是輪迴。大疏云：「以厭此娑婆為捨，欣彼極樂為取，謂是顛倒妄想，變現輪迴之相」。此言未免損者多，益者少，所謂醍醐與毒藥，相去不遠矣。既用緣影為心，必致被佛訶也。

◆問者必有宗旨。答者亦必答其所問之處。就此文麤觀之，似並未答其問處。不知如來，乃就金剛藏問難之根本處；建立答意也。

◆看《圓覺經》，須先看二書：一、《唯識論》，二、《起信論》。圓覺所修，是菩薩境界，我輩須先由眾生分上用功，故宜看唯識，了得性相，方有下手處。

◆普賢章教人觀身如幻。如幻二字，不但正報然，依報亦然。須知依正二報，不外依他起性。而依他如幻，原依圓成實性而起。不明唯識，此義不能了然。

◆《起信論》中真如生滅二門，皆可與此互相發明也。若就依他起性，妄生分別，則墮於遍計所執性。金剛藏恐末世不免此病，故設三難。

◆第一難即執圓成以難遍計。第二難又執遍計以難圓成。實則依他不離圓成。由此起分別我法二執，則墮於遍計。不起分別我法二執，則歸於圓成。所謂迷之則有生死，悟之則得涅槃。佛為眾生方便說此三性，三性本是一性也。世間無一法不是依他起性。真如無

明，本是一法。佛之答意，即從依他起性建立。三種世間，皆依他起性。若對之起分別我法二執，則處處是遍計。若不起分別，即悟圓成實性，無明本空矣。

◆何謂三種世間？一、正覺世間：為四聖。二、有情世間：為六凡。三、器世間：為山河大地。正覺世間所以有始終生滅者，佛之出世，為度眾生故，而有始終，中間度生，變易非常，故有生滅。菩薩度生，亦有此四相。二乘雖自利，亦有此四相。

◆有情世間所以有前後有無者，前眾生如父之生兒，後眾生如人之亡歿；生者有相，歿者無相。器世間之起止，謂住前有起相，住後有止相也。以上皆依他起性。即是《起信論》中所謂生滅門。

◆然單指生滅門，則生後無滅相，滅後無生相。今言念念相續，則生死不斷，成壞不已，正報依報，無有窮時也。於三種依他起性世間，不生憎愛，則不起取捨，當體即是圓成。若一起憎愛，即有取捨，妄生分別，墮於遍計；而有我法二執，則不能逃出生死，故有

輪迴。遍計是生死之根，遍計不空，輪迴不能出。此輪迴乃直指眾生生滅之心。皆是輪迴者，言用輪迴心，妄起分別，不是我執，便是法執也。（以下糅合《金剛經講義》）

***徧計執性：**謂普徧計較執著也。即性宗常說之分別、執著、攀緣、無明、妄心、妄想等。

***依他起性：**即性宗所說之緣起、緣生、性起，此正本性隨緣現起之相用。相用原不離乎性體，若無性體，便無相用，故曰：依他起性。依者，隨也。他，指眾緣也。

※《成唯識論觀心法要》卷七云：「染分依他，因緣所生六凡法也。淨分依他，因緣所生四

聖法也。六凡諸法，既已一一即空假中；四聖諸法，何

獨不然！故曰：十界無非即空假中。」

***圓成實性：**圓：謂圓滿。成：謂本具。圓成二字，約體說，明其本來圓滿具足，非造作法。亦兼約相用說，謂相用為體所本具，淨德圓滿也。實，即真實。此即性宗常說之法界、真如、如如、真心、實相、圓覺、自性清淨心等，其名無量。性宗亦謂之真實性也。